

WAN SAFRI SABANAWINTI

Gian Marsan

Na mindri dusun tiri stari,
di son e kiri
te manten bari,
a gers krofaya miti dipi se,
yu wawan ben de
so farawe.

Mi moi redi buba Ingi Sisa,
di kon grani fu sidon
lek wan rowsu mindri pratilobi
èn wan karu in aleisgron.

Opo den yarsi kon mek mi si
pe someni gesontu yari e tan,
so fara fu Perica,
so fara fu mi,
fu den kula san las na Marwina
in a brenki watra fu Kasikasima;
so fara fu Laduwani,
so fara fu wi.

Seibitenti pepremoisi mi trowe
fu tiri na opruru sula
pe m' las yu kriboi portreti
san wasi gwe
na sowtu se.

Opo den yarsi.
Sor mi yu ai,
bifos dow fadon,
bifos dungru e blaka
a redi baka fu a son.

Opo den yarsi.
Yu pipel e angri fu bari
in a krafana fu ded' anga sari
ondr'a prasoro fu tiri toti stari
tak wan safri sabanawinti
safsafri e kowru na dow
in mi grun kotomisi dyari.

Tide,
pe bunkop dede e lontu mi,
pe deiten faya e afrontu wi,

fo ondrodusun afo fu tamara,
nanga a boskopu san tyari fu fara
in den beifi wortu di lasi blo
in a sukruyendoti fu katibo,
musu fu span,
in wan kondre
sa e prefuru fu kari
en srefi Sranan.

Opo den yarsi, Ingi Sisa.
Makandra w'o tyari
den fini frede faya
fu dusun tiri stari
in wan lontu brenki son.

Opo a fensre.
Arki,
fa mindri tiri toti stari
- asranti lek konsens fonfon -
trubu skwala fu Watrasei e bari
tak wan safri sabanawinti
safsafri sa kowru na dow
in mi grun kotomisi dyari.

Opo den doro, lus den kruyara
sor mi yu bromtyi fu tamara,
mi moi redi buba Sranan,
mi lobi redi rowsu,
èn bos mi bifos dow fadon.

[HOME](#)